



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tiryimym@aolima



tir yimym

TAPAK 8

**Congress Tir Kharge INDIA
teloktep nung Chairperson shim**

**Rapid-Fire Shooter Vijayveer-i ano
Olympics quota ka nguogo**



VOL. XXI NO. 91 (ADOK 91)

DIMAPUR

AMUNGNÜ (SUNDAY)

ANJETI (JANUARY) 14, 2024

₹ 5.00



Hamara sankalp Viksit Bharat

Modi Sarkar ki Guarantee

Sensaker aser tangar memenepertem yarir.

Tesüiba küm 5 tsüingda nisung crore 13.5 sensaktia
nungi anitetogo



Tanü nungi Bharat Jodo Nyay Yatra tenzüksü

Imphal, January 13, 2024 (Agencies): Deobarnü Manipur kübok Thoubal district nungi Congress lennir Rahul Gandhi-i Bharat Jodo Nyay Yatra tenzüksü.

"Iba Yatra ya asüing Thoubal jila nungi tenzüksü. Rahul Gandhi asüingnep 11:00 ako nung Imphal atongtsü" ta Congress lennir Jairam Ramesh-i ashi.

"Asüing Thoubal nungi Bharat Jodo Nyay Yatra tenzüksü. Rahul-i anepdang 11:00 ako nung Imphal tonga aruba sülen Khongjom War Memorial-i indangindanga aotsü. Bharat Jodo Yatra ya Indian politics nung temelenshi aruba mapa ka liasü. Iba mapa tejakleni anir oa Rahul-i Bharat Jodo Nyay Yatra tenzükür" ta Ramesh-isa ashi.

Bharat Jodo Yatra ya mezüing mera liasü aser Bharat Jodo Nyay Yatra ya tanabuba mera lir, ta paisa ashi.

Rahul Gandhi-i tarutsü anogo 11 tashi Northeast kübok state 5 nung Yatra len anitsü ta Ramesh-isa shisem.

"Asüing nungi tenzükür kilometers 6,200, anogo 66 shi agitsü aser taruba anogo 10 nungi 11 tashi Northeast nung iba sentong agitsü. Northeast state 5 nung Rahul Gandhi-i Bharat Jodo Nyay Yatra len ania agitsü" ta paisa metetdaksü.

Narendra Modi-i BJP sorkari tesüiba küm 10 tsüingda temeten anema inyakba anema Bharat Jodo Nyay Yatra agir. Prime Minister-i Amrit Kaal pungmang

tajung sayur. Ajisüaka tesüiba küm 10 tsüingda temeten anema inyaka aruogo, ta pai ashi.

Parnoki tesüiba küm 10 tsüingda temeten magütsüba amadokdaksünür. Tesüiba küm 10 tsüingda social, economic aser political nung temetentem magütsü. Item nung ajemdaker Yatra agir. Constitution indang onangnen tamendakdakji temeten lir anungji Bharat Jodo Nyay Yatra agir, ta Ramesh-isa ashi.

Taruba ita ana tsüingda Yatra agia aodang Rahul Gandhi-i public sendentem ayonga agitsü aser socio-political organisations den ajuruteptsü. Iba mapang Rahul Gandhi-i Congress onüktem benoka lemsateptsü aser Congress-i linük nung nübortem nem temeten agütsütsü, ta paisa metetdaksü.

Bharat Jodo Nyay Yatra ya election dak sendakba masü saka tangatetba Yatra ka lir ta Ramesh-isa shisem.

Rahul Gandhi-i aniba Bharat Jodo Nyay Yatra ya January 14 nü Imphal nungi masü saka Manipur kübok Thoubal district nung nija ground ka nungi tenzüksü.

"Mezüingbo Imphal nung aliba Hapta Kangeibung ground nungi Yatra tenzüksü temelaba meshi saka state sorkari tatemzükba kar yutsü. Iba jagi sentong tenzüksüba tesem kilometre 34 shi pilatsüsa aküm" ta Manipur Congress president Keisham Meghachandra-i ashi.

Indian Army-i 'Operation Sarvashakti' tenzükür

New Delhi, January 13, 2024 (Agencies): Jammu and Kashmir nung Pakistan-i kiralongraba mapa inyakba azüoktsü atema Indian Army-i Operation Sarvashakti tenzükogo.

Iba operation ya Jammu and Kashmir nung Pir Panjal tenemkong anatsülen kiralongrartem anema inyaksü.

Ita ishika Pir Panjal tesem nung aser talisa Rajouri-Poonch sector Pakistani proxy terrorist groups ajanga kiralongraba mapa inyaka arur.

Kiralongrartemi amakba lendong balala nung sepia 20 tashi

taküm samaogo aser tesüsubabaji December 21, 2023 nü Dera ki Gali tesem nung sepia 4 khasetba liasü.

Operation Sarvashakti ya Pir Panjal tenemkong anatsülen kiralongraba anema inyaksü. Srinagar nung amenoka aliba Chinara Corps aser Nagrota nung amenoka aliba White Knight Corps ajanga kiralongrartem anema mapa inyaksü.

Pakistani nungernoteptsü atema Jammu and Kashmir Police, CRPF, Special Operations Group aser intelligence agencies külemi yaritepa inyaksü.

CM Rio-i Tuensang nung Poanglüm benjungmong nung aden



January 13, 2024 nü Poanglüm Mini Hornbill Festival nung Chief Minister Neiphiu Rio aser tangar külemi agiba noksa angur.

Tuensang, January 13, 2023 (DIPR): January 13, 2024 nü Chief Minister Neiphiu Rio-i Poanglüm Mini Hornbill Festival Lüm Lin (Joyous Parting) nung denogo.

"Iba benjungmong nung adenba atema kanga pelar. Pai Khristan yimsü aser shisaliok aruba ajanga Naga nung kanga tejakleni ogo" ta CM Rio-i Parade Ground Tuensang nung jembidang ashi.

Naga nung asoshi Indian Constitution nung ali aser rongsen aser sobaliba temetentem kümzükä ayutsü latetja lir. Nagaland dang "Land

of Festival" ajar anungji asenoki asen sobaliba, inyaksangshi sayuba den local products ajungkettsüla, ta paisa ashi,

Yaküm Hornbill Festival nung tesüiba mapangtem dang nungi tourists teimtiba aruogo, ta CM Rio-isa ashi.

Iba benjung nung adenertemi yimjung aser telongjem atema inyaksüla. Nagaland nung opposition maliba sorkar ya yimjung aser telongjem tamaitü lir. Naga yimten latetba sülen terenlok aika arutsü aser bendanglen nungi Nagaland nung arua mapa inyaksü mulunga lir,

ta paisa metetdaksü.

Iba sentong nung Chief Minister Rio-i Mongku Yanchu Chang IPS nem Qui-Quy (Highly Exalted) award aser Millet Production atema Phinjam News letter o Chingmei Village nem sempet agütsü.

Iba sentong nung Housing & Mechanical Engineering Minister P. Beshangmongba Chang host liasü aser RD and SIRD Minister Metsubo Jamir, Fire & Emergency Services, Home Guards & Civil Defence Advisor S. Kiusumew Yimchinger nung den ketdangsür aika aden.

INDIA bloc convenor atema Mallikarjun Kharge shim

New Delhi, January 13, 2024 (Agencies): Opposition bloc INDIA nung chairperson inyaksü atema Congress president Mallikarjun Kharge shimogo.

Tanü Opposition party 28 teloktep INDIA senden ka amendang Kharge shim.

Iba senden nung Bihar Chief Minister Nitish Kumar-i convenor inyaksü magizük ta osang angazükür.

Indian National Developmental Inclusive Alliance (I.N.D.I.A) lennirtemi teloktep akangshitsü aser 2024 Lok Sabha elections atema menden lemsateptsü asalentong yanglu.

Honibarnü video conferencing ajanga agiba

INDIA bloc senden nung Tamil Nadu CM aser DMK lennir MK Stalin aser party leader Kanimozhi Karunanidhi na aden.

Ajisüaka tanü senden nung Trinamool Congress aser Samajwadi Party nungi lennirtem maden.

Yashi Aam Aadmi Party aser Congress lennirtemi menden lemsateptsü senden ka amen aser Congress-i senden junga menogo ta metetdaksü.

INDIA bloc lennirtemi taruba Lok Sabha election atema Delhi, Punjab aser tanga state tem atema menden lemsateptsü jembu. Ajisüaka Hombarnü menden lemsateptsü senden amenba osang tejangja memetetdaksür.

INDIA (Indian National Developmental Inclusive Alliance) ya Congress dena opposition party tem teloktep ka lir. 2024 Lok Sabha elections nung Bharatiya Janata Party (BJP)-i aniba National Democratic Alliance (NDA) sorkar den tokteptsü atema parnok loktep.

2024 Lok Sabha elections agitsü mapang tonga arudang India yimtenren maparen nung temelenshi aika adoker.

2019 Lok Sabha elections nung NDA-i menden 353, UPA-i menden 91 aser tanga party temi menden 98 nung takok ngua liasü.

2024 Lok Sabha elections ya Modi'er sorkari aniba NDA aser INDIA bloc tsüingda tokteptsü.

Khongjiri Students' Union Silver Jubilee mungogo



Advisor S. Kiusumew aser tanga ketdangsürtem den Khongjiri Students' Union (KSU) ketdangsürtem nüngshilong sayaba sülen tangokba noksa nung angur.

Kohima, Aenjeti/January 13 (TYO): The Khongjiri Students' Union (KSU) silver jubilee benjungmung den repsema 58buba Yimkhiung Akherü Arihako (YAA) Federal Assembly January 10 aser 11 nü Kiphire district kübok Khongjiri yimtsüung nung mungogo.

Silver jubilee benjungmung ya "Resilience and Radiance" omen nung ajemdkaer January 10 nü amung kong MLA & Advisor for Fire and Emergency Services, Home Guards, Civil Defence, Relief & Rehabilitation, Government of Nagaland, S. Kiusumew alakteta jaoker liasü.

Sentong nung o jembiba mapang alakteta jaoker-i, telongjem aser education koda tongtibang iba indang lemsatep aser sentepa aliba lokti dang tangar lokti menepa anitsü atema telongjem nung alitsü

aser kaket shisatsü meranga bushitsü ayongzük.

Kasa mapang nung tetushi tejaoker, Extra Assistant Commissioner (EAC) Khongsa Yithachu Thurr-i, skill development koda tongtibang iba indang lemsatepba den kaketshirtem dang takok angutsü atema parnoki kechi janrar aser parnok sempet kechi aji bushitetsü ajungshia liasü.

Sentong nung KSU mezüngbuba tir Ningjimong, YAA tir mezüngbuba Keyoungkhum aser YTC Executive Chairman Makhezho nungeria o tatsütsü jembia liasü.

Kasa mapang nung Khongjiri Students' Union tir Ningsangwu Bomrr-i tir o jembia, Silver Jubilee Planning Committee mendebuba Azho Paul-i lokti pela agizükba o jembia aser KSU V.P

Khamkiumong L. John-i tepela o jembia liasü. Iba sentong ya Salenthong aser Latsu A na lenisüba nung agia liasü.

Sentong nungsa Apentsu Merr, Moya Village Students' Union aser Pungro Town Students' Union nungeri shilem balala agia liasü.

Maneni nikongtsütsü kaketshirtem atema skill development dak sendakba nung seminar ka ayongzüka katsü. Iba seminar ya "Skill Development and Employment Worldwide" nung ajemdaker Emporium, Nagaland-i achaayanga katsüogo.

Silver jubilee nüngdem nung tetushi tejaoker-i souvenir sayatsü aser alakteta jaokeri nüngshilong sayaja liasü.

Kasa mapang nung January 11 nü 58buba Yimkhiung Akherü Arihako (YAA) Federal Assembly Khongjiri yimtsüung nung agiogo.

Mon nung District Welfare office semzükogo



District Welfare Office Building, Mon semzükba mapang tangokba noksa nung angur.

Dimapur, Aenjeti/January 13 (TYO): Social Welfare Department indang District Welfare Office Building January 9 nü Secretary, Social Welfare, Martha R Ritse, IAS-i Director, Tosheli Zhimomi aser Deputy Commissioner Mon, Shri. Ajit Kumar Verma, IAS na matsüngdang semzüksüogo.

Office lapokba sentong nung o jembiba mapang Martha R Ritse-i, DWO office Building takok ngua yanglutetba atema kanga pelaba lemsatep, aser officer aser staff tem dang iba office ya lokti nung tekübokba jenjang nung alirtem tenzüksü atema amshitsü ayongzüka liasü.

Sentong nungsa Director Social Welfare, Tosheli Zhimomi-i, officer aser staff tem dang parnok mapa bendanga agüja nendaka inyaksü ajungshi.

Kasa mapang nung Deputy Commissioner Mon, Ajit Kumar-i, iba office takok ngua yanglutetba atema department nem tenüngsang agütsü aser iba amala facility/infrastructure ajanga office aser staff tem mapa tali tetangshiba akümtsü imlaba lemsatepa liasü.

Office ki ya Ex. Secy KBBB, Mon Rev Chemyuh-i meshiteta sarasademsü. Office lapokba sentong ya CDPO Phomching, Khonbeni Jami lenisüba nung agi aser DWO Mon, T. Yanlem-i lokti pela agizükba o jembia liasü.

Sentong nungsa Mon District Disabled People Society-i ken tajung ka aten aser ki asüba indang osang engineering wing-i agütsü aser tepela anküp o DPO ICDS Mon, Tsalito Sangtam-i jembia

liasü. Office ki tasenba mesemzük tsüngda January 8 nü coordination senden ka amen, kong Director, Social Welfare Department ketdangsür tejentem aser Social Welfare Mon nung officer aser staff temi shilem agia liasü.

Senden nung Director-i, office aser staff tem dang parnok ata aliba tesemtem toktsür maotsü aser pei mapa nendaka inyaksü ajungshi. Director-isa, department kübok tainlonglong tetsürtem atema PMMVY, Scheme amala sentong balala indang metetdaksü. Maneni officer aser staff tem dang service balala beneficiaries tem nem agütsütsü asoshi takokba tashi inyaksü director-i ajungshia liasü.

Dimapur nung mejangjaba tasü mang ka nguteta lir

Dimapur, Aenjeti/January 13 (TYO): January 13 nü arishi küm 30 nungi 35 tsüngda asütsü ta bilemba mejangjaba tebur ka tasü mang (non-local) Sewak Colony, Dimapur kübok Faith Hospital opposite nung Lotha Assembly of God Church anasa kilentsü ka nung ngutetogo.

Ken o dak sendakba nung bushisüngdangba mapang asüsang tenütsü aser pa tekolak tesülen tarak liasü, koba oset takang kari züoktsüba asütsü ta temulung meleme bilemer.

Iba dak sendakba nung tasü mang ngutetba tesem temeket nung alirtem dang asüsang maitsü jangjatsü

atema ken o ashishi, ajisüaka shingaija mejangjai laisü. Temzüng ozüng kübok tinyaktsü maparen ajak tembanga inyakba sülen tasü mang ya post-mortem examination aser identification atema District Hospital morgue-i benerogo.

Asüsang ya sentsü temesüng, pa tenük tachichilen lepluscü ka keta liasü, pai blue jean pant, green sweater aser green T-shirt semer liasü.

Ken o dak sendakba nung asüsanger kinunger aser medemertem dang Officer-in-Charge, West PS, Dimapur (Mobile No. 7085055024) den tongteprateptsü mepeshia metetdaksüogo.

Hiren Gohain tilutsüba atema Assam CM aitsü

Guwahati, Aenjeti/January 13 (Agencies): Assam Chief Minister Himanta Biswa Sarma-i nüngtugu scholar Dr Hiren Gohain tiluja jembiba atema pa lenla balala nungi taittsüba aika ajangshia arudar.

Dr. Gohain-i tawa Assam nung aliba nüburttem dang Citizenship (Amendment) Act (CAA) benokba anema nokdaksü atema temepeshiba ka agüja liasü. Iba dak sendakba nung Chief Minister Sarma-i telangzüba agütsü, koba aikati Gohain tiluja jembiba ama agizker.

Dr. Gohain akümtsübuba aser mepetmesü tali adokyonga maotsü atema CM-i ashiba o ajakbo osang kaket nung melemsateper, ajisüaka CM telangzüba ajanga aika dang kongshio.

Raijor Dal tekolakba aser Sivasagar MLA Akhil Gogoi-i, Chief Minister-i telangzüba agütsüba aitsüogo aser ashiba agi iba olen ajanga Dr. Gohain dang masü saka Assam nunger ajak tilutsüogo. Paisa, iba olen lemsatepba sülen Sarma ya pa mapa abentsü atema temsüa ali mali aji ashishi aser ashiba agi, iba amala olen ya lokti lenir kati aser talisa Chief Minister kati jembitsüba olen ka masü, ta ashi.

Kasa mapang nung Asom Jatiya Parishad (AJP) tir Lurinjyoti Gogoi-ia, Chief Minister aitsüogo aser ashiba agi, pai jembiba olen ya tapet masü aser iba ajanga telem dang adokdaksütsü.

"Telem dang adoktsü aliba mesüra tangar mezüngmeshia jembiba olen yabo lokti lenir ka aser talisa temaba jenjang nung aliba lenir kati mejembitsüla. Onoki lenir ajak dang lokti nung telem dang adoktsüba olen masü saka telongjem atema tongtibangsa inyaksü mepeshir," ta Gogoi-i ashi.

Political scientist Dr. Apurba Kr. Baruah-ia, Sarma aitsüogo aser ashiba agi, sorkar inyakyim anema nüburttemi nokdakba nungi piladaksütsü nükjdong nung iba olen ya lemsatepba lir.

Paisa, nüburttem dang kati ka tsüngda aitsütepba dak merangloksü saka sorkar dak

tai tongloksütsü atema rangloker alitsü ayongzüka liasü. Social media nunga nüburttem aikati Chief Minister aitsüogo aser pai tang bena aliba mapa abentsü metemsü ta shio.

Terenlok asoshi railways nüngdaker: AL Hek

Guwahati, Aenjeti/January 13 (Agencies): Khasi aser Jaintia Hills nung railways mamenok tsüngda Inner Line Permit (ILP) benoktsü atema akhangba mapang Cabinet Minister, AL Hek-i, Meghalaya nung railways amenoktsü pusama jembio.

BJP lenir tejen yagi ashiba agi, railway amenokba ajanga Meghalaya nung terenlok bener arutsü.

Pai, "khu abenba train süang, passerger train süang mesüra toy train danga süang Meghalaya-i terenlok bener arutsüla," ta ashi

Lokti tentet balalai Meghalaya nung railway mamenok tsüngda ozüng alema state-i aiterem azüoktsü atema jenjang tapet agütsü akhangba mapang nung Tetelia-Byrnihat railway project bangdaka lir.

Lokti tentet balalai iba tebilemstü lemsatepba ya tim ta ashiba den BJP lenir yagisa, Meghalaya renloka aotsü nüngdaker aser iba den mapa tali adokdaksütsü aser railway ajanga alirongsen balala bener arutsüba nüngdaker ta ashi.

Railways anema nokdakba teloktemi ashiba agi, sorkari tamsa ozüng alema state-i arurtem azüoktsü atema jenjang tapet agütsüla.

Hek-i, iba takhangba ya lokti tentet balala tebilemba dang lir ta ashiba den railway ya terenlok, employment, resources aser revenue atema kanga nüngdaker ta ashi.

Paisa, Meghalaya nung railway project agizüksü atema Centre renema lir aser iba inyakyim atema tesem balala asadang tenzükogo.

Temetetsükaji sorkari tamasabo iba project ya Khasi Hills nungi Jaintia Hills-i belener aotsü merang dang ajisüaka nüburttemi aja anema liasü.



January 13, 2024 nū New Delhi nung Chief of Defence Staff General Anil Chauhan, Chief of Army Staff General Manoj Pande, Chief of Naval Staff Admiral R. Hari Kumar aser Chief of Air Staff Air Chief Marshal V.R. Chaudhari nungeri National War Memorial nung asürtem nem akhüm agütsüdang tangokba noksa nung angur.

Congress Tir Kharge INDIA teloktep nung Chairperson shim

New Delhi, January 13 (Agencies): Lok Sabha elections agitsü joko ita ishika dang lia Honibarnü opposition teloktep INDIA-i Congress Tir, Mallikarjun Kharge Chairperson shimogo.

Video conferencing ajanga INDIA teloktep nung züngsem party tem senden amenba sülen INDIA bloc chairperson menden atema Kharge shim.

Iba senden nung party tem tsüngda menden lemsatsü atema jembiba den külemi Rahul Gandhi leniba nung agitsü aliba 'Bharat Jodo Nyay Yatra' nung shilem agitsü atema jembiba.

Hokolbarnü Congress

general secretary in charge of communications, Jairam Ramesh-i X ajanga, "Asüing January 13 nū anüingdang 11:30 ako nungi Zoom ajanga INDIA party lenirtem senden amentsü. Parnoki menden lemsatsü densema onük aika jembitsü, yanü Imphal anasa Thoubal nungi tenzükba Bharat Jodo Nyay Yatra nung shilem agitsü atema jembitsü aser tongtibang onük aika jembitsü," ta metetdakja liasü.

Hokolbarnü AAP lenirtem aser Congress lenirtemi Delhi aser Punjab na densema state kar nung menden lemsateper tokteptsü atema jembiba liasü.

Congress lenir Mukul Wasnik'er kidang ayongzükba sendenji ghonda ana dak tema mena liasü.

Senden tembangba sülen Congress lenir Salman Khurshid-i, "Onoki onük aika nung o lemtepogo. Onoki temelung teladak süa ajak lemsatepogo koba ajanga onok tali tashi itshitsü. Senden kanga junga menogo. Bilemba dang nungi tajungba senden menogo ta nibo bilemer," ta metetdaksü.

Iba senden nungji AAP nungi Raghav Chadha, Atishi, Sandeep Pathak aser Saurabh Bharadwaj nungeri party tenüing nung shilem agia liasü.

British ketdangser, Jane Marriott-i POK semdangba India-i ashishir

New Delhi, Aenjeti January 13 (Agencies): Tawa United Kingdom High Commissioner to Pakistan, Jane Marriott-i Pakistan-occupied Kashmir (POK) semdangba sülen Honibarnü India-i ibaji kanga ashishia aitsüogo.

January 10 nū lai PoK kübok Mirpur semdanga liasü.

Honibarnü Ministry of External Affairs (MEA)-i sangdong ka ajanga, Marriott-i PoK semdangbaji onoki kanga ashishir, kechiyong iba ya India nung nuchiso aser litsü temeden anema inyakba den kasa lir, ta metetdaksü.

Foreign Secretary, Vinay Mohan Kwatra-ia British High Commissioner in India den ibaji lemsatepogo, ta MEA sangdong

ajanga metetdaksü. "Union Territories of Jammu & Kashmir aser Ladakh ya India shilem ka liasü aser teti India shilemsa asütsü," ta External Affairs Ministry-i metetdaksü.

Pakistan occupied Kashmir semdangba sülen Jane Marriott-i X ajanga noksa kar lemsatepa liasü aser 'British Pakistani nunger tera shilem 70 bo Mirpur nungi lir' ta metetdaksü.

"Mirpur nungi Salaam ya UK aser Pakistan nunger na tsüngda tesendaktep temelungjang lir! British Pakistani nunger tera shilem 70 bo Mirpur nung lir, koba ajanga linük ana nung aliba bendangertem atema asenoki longjemmer inyaktsüji tongtibang

kümdaktsür. Nenoki junga agizükba atema pelar," ta lai lemsatepa liasü.

Lai PoK semdangba sülen social media amshirtem aikati la aitsü.

Social media ajanga aikati, UK sorkari par ketdangser ka Pakistan-occupied Kashmir-i yokbaji taaktsüka lir, ta metetdaksü aser karibo, British Ato kilonser Rishi Sunak-i la anema temerenshi agütsütsüla, ta takhangba agütsü.

Yaküm October ita nung US envoy to Pakistan, David Blome-ia Pakistan-occupied Kashmir kübok Gilgit-Baltistan semdanga liasü. Iba mapang nungjia Centre sorkari US ketdangsertem den India-i ibaji ashishiba lemsatepa liasü.

ED-i maneni Delhi CM Arvind Kejriwal jaoker

New Delhi, January 13 (Agencies): Enforcement Directorate (ED)-i tang agi pezübenbuba AAP tongti aser Delhi Chief Minister Arvind Kejriwal dang asüingdangyatsü atema parnok matsüingdangi arung, ta tuyuogo.

Delhi excise policy ochimashi ken o dak sendakba nung ED-i January 18 nū parnok matsüingdangi arung, ta Kejriwal nem metetdaksüogo.

Tamalen-a ED-i pa asemben tashi jaoka liasü saka pai ED matsüingdangi khen danga mao.

ED-i mezüing yaküm November 2 nū Kejriwal jaoka liasü, ajisüka pai ED-i yimtenren tsütsülen nungi ozüing alema pa jaoker ta shia ED dangi mao. ED-i maneni December 21 nū pa jaok saka Kejriwal-i pai ED dang asüingdangba kar ED-i melangzü, ta shia ED dangi mao.

ED-i maneni Kejriwal dang January 3 nū parnok matsüingdangi arung ta tuyua liasü, saka Kejriwal-i, pa jaokba ya ozüing alema lir ta shia ED dangi mao.

Yaküm August 17 nungi tenzüka ED-i Delhi excise policy nung ochimashi liasü ta tai tonglokja aliba ken o bushisüingdang tenzüka liasü. Iba mapang nungji ED-i CBI indang FIR ka nung ajemdaker Prevention of Money Laundering Act (PMLA) kübok ken o ka benoka liasü.

Kasa ken o dak sendakba nung yaküm CBI-ia Kejriwal jaoka liasü, ajisüka CBI indang FIR nung tai tonglokja alirtem rongnung Kejriwal tenüingbo densema mali.

Kasa ken o dak sendakba nung CBI-i yaküm February ita nung taoba mapang Delhi deputy chief minister, Manish Sisodia apu.



January 13, 2024 anepdang Mathura nung police temi taruba Republic Day atema Parade renemshidang tangokba noksa nung angur.

China den tesendaktep ajungtsüji arrtsü telemtetba dak aket: Jaishankar

New Delhi, January 13 (Agencies): Tang China den arrtsülen mangatettep aliba dak sendakba nung External Affairs Minister, S Jaishankar-i, China den tesendaktep tajungba akümtsüji arrtsülen mangatettep bentetba dak dang keta lir, ta metetdaksü.

'Bharat's Rise in Geopolitics' onük nung o lemtepba mapang Jaishankar-i 2020 küm India aser China na tsüngda tezüngzüktepa agia aliba alema Line of Actual Control (LAC) nung sepaitem senzüba metetdaksü.

Jaishankar-i, "Arrtsülen mangatettep ken o mebetet tashi parnoki (China) tesendaktep tajungba akümtsü meimlatsüla. Raraba mapang nungbo nai shishilemba mesünütsü. Ken o bo tejembidak saka tensa tamajung nung telemtetba tajung kera magiteter," ta ashi.

Tawa Maldives den tesendaktep tera raksaba dak sendakba nung Jaishankar-i, tesendaktep tajungba akümtsü atema rangloker inyaktsüla, ta

ashi.

United Nations aser Security Council nung India permanent züngsem akümtsü atema inyakba dak sendakba nung tasüingdangba ka langzüdang Jaishankar-i, tesüiba küm ishika tsüngda UN tashi ilaa kümogo aser alima nung rongsenkettzüng tulutiba linüktem rongnung ka ama UN Security Council nung India züngoktsü menor, ta ashi.

Iba dak sendakba nungsa Jaishankar-i, "Alimai melamela magütsür, anungji khenkenbo asenoki mera agia inyaker agitsüla. Onoki maneni inyaktsü," ta ashi.

Alima nung rongsenkettzüng tultiba linüktem rongnung India jenjang pongububa nung liaka India nunger aikati bendangleni oa aliba dak sendakba nung tasüingdangba ka langzüdang Jaishankar-i, ibaji pei melung nung inyaker, ta ashi.

Paisa, India nung mapa maongka taliba aser tajungba agütsütsü atema nendaka inyaktsü nüngdak, ta ashi.



January 12, 2024 nū Mumbai nung semzükba Atal Bihari Vajpayee Sewri-Nhava Sheva Atal Setu apu noksa nung angur. Kilometer 21 talang apu ya India nung tzüyim tepdanga yangluba apu talangtiba lir.



TIR YIMYIM YIMOBILEM (EDITORIAL)

DIMAPUR AMUNGNÜ, JANUARY (AENJETI) 14, 2024

Nūsasa ajemaluang

Asen taküm nung asen ajemalutsüba mesüra asükümtsübaaji asen dak keta lir, anungji asen mulung. Ajisüaka, Laishibai ashir, " shibaisa peisasa uludir, pa tila kümdaktsütsü saka shibaisa peisasa tila kümdir, pa uludaktsütsü." (Luke 14:11). Atangji, alima nung ajaki tulur kümner aser aküm aginer. Nisung ajaki ajak nem züngshidaktsüner. Aji oda, tangari züngshitsüsa ulutsübaaji lenmang ana lir. Lenmang kaji alima shi tsütsü kija indang bilema ulutsü akok. Anungji, shibai Tsüngremi aküm metsübai alima nung ulutsü indang bilemer, pai mesüra lai akok tashi tangar ajemzuka yutsür pei kija temai atutsüba, pei kija nungtugu akümtsüba aser pei agitsü aser ulutsü indang bilemer. Atangji, ken atemabo item jagi takok angutsü, itemji nungtugu akümtsü aser itemji kanga ulua angutsü. Ajisüaka, laishibai ashir, shibai ajemalu mesüi kanga ulunüdir pabo tila kümdaktsütsü. Tsüngrem amadoker, peisasa pei ulunertem Tsüngremi tila kümdaktsübaaji komaka ilaa kümdaktsüdir na ta kanga tsüba bilemer. Aji oda, pei mulungjang nungbo temeim aser tajung kecha mali ser nung tangar tsüngdang tenüng agitsü asoshi temeim mapa inyaka sayuba, nübertembo memeimer ser nung tenüngsang agitsü atema mapa tajung inyaka sayuba aser tenüngsang agitsü atema lokti, arogo aser yimten tenzüka asüküm aser anemsü jakla agi asen taküm aser kibong mali amato küma ilatsüba indang Tsüngrem o agi ashir südi ta angatetter. Ano, pei taküm tangari züngshitsüsa ulutsübaaji lenmang ka lir aser ibajibo Tsüngremi mulungba nung uluba asütsü. Tsüngremi mulungba nung uludaktsübaaji ajemalu nungi tenzüker. Nisung ka ajemalutsüba ya alima dak aketba yimya ka masü. Ajemalu tetezü lapi, tasü mait aser tamajung dang majunga ta meshitetba, ajak nem mezüngmeshidakja aliba taküm masü. Aji oda, Laishiba (Zungdangba) nung alima nung ajemalutibaji Mosa liasü ta shia angutsü. Ano, Yisua " ni ajemalulur' ta shia angutsü. Aji oda, par adianu den raratepa alisang Egypt nungba tepsetsang to ajemalu Mosa liasü, par nübertemi süngyanglu külema ngur ain adoka Tsüngremi agütsüba ozüng longpak jaksasang to ajemalu Mosa liasü. Aji oda, Yirusalem tenla ki agi sen melenba aser shishilembaba ki kümdaktsür angudang ain adoka langpang ajak meküpdoktsür yangji shishilembartem ajak aridoksang to ajemalu asen kümtetdakba Yisu liasü. Aji oda, ajemalu Mosa Tsüngremi ulutsüba asenoki Laishiba nung angur. Alima nung ulutsüba aser ilatsüba ya Yisu Khrista taküm alidang asenok ajaki angatettsüsa Luke 14 nung o entepba ka shia lir. Iba otsü nung nisung shibai pasasa uluner, pa mak asütsü saka shibai tila akümer tangari pa ulutsütsüba indang shia lir. Ulutsüba yabo nūsasa masü saka tangari kodang nü dak tajung reprangtetter aser naji ulutsü tetemsü ta angatetdir, idangji dang uludakjang ta laishibai ashir. Aji oda, kodang alima tsütsü na ajungketer, tenüngsangji nü kija agitsü saka kodang Tsüngrem nem na ajungketdaktsür, idangjibo tangar aikati nü taküm jenjang ngua Tsüngrem nung asangtsü aser ano nü tenüng tali ajungkettsütsü. Tsüngremi mulungba nung asen ulutsü aser ajungkettsübaaji lenmang ka dang lir, ibaji asenoki Tsüngrem akümtsübutsula. Asenoki Tsüngrem akhümtsübutura Paia asenok akümtsübutsu ta 1 Samuel 2:30 nung shia lir. Iba Laishiba tapu nung shia aliba indang bilemdangdang, Tsüngremi akümtsübutura nisung akhümjia kobatetka ulua alitsü ta kanga jangratema bilemer. Tsüngremi asenok ya alima nung tulur aser takar küma jangratema alitsü yutsü, kechiyong ali tema aser telong nung aliba rongsen ajak madak asenok kibur kümdaktsü. Ajisüaka, Tsüngrem nükjidong tongteta asenok ulua akümtsü atema asenok ajemalutsüla. Ajemaluba tetezü asen jakliro, ain apong, asüküm, mezümeküm aser tiaksangba jaklatem ajak Tsüngrem nem azüokdaktsütsüla. Asenok nisung meimchir yabo arem shiruru amato, mazüokra shinga nema teyari magütsütettsü. Aji oda, asenoki Tsüngrem akümtsübutura Pa nem azüokdaktsüdi aser ajemaludi. Idangji Pai asen ulutsütsü.

OLEMSABANG

NAGA NUNGER LEMTET LENDEN

~ P. Renthly Jamir

Asenok Nagalima nung Jubilee benjong amungba tapu balala telok balala anogoshi osang kaket nung angur. Yamaji Naga nüchiso bushiba tenzüker küm 75 abensaba osanga tamalen angashiogo. Israel nungerbo Hon Jubilee amungtsü küm ter lia Kananli atong aser asenoki kanga luja parnoki Tsüngremi ashiba mangaba agi ta bangpetsa jembai. Saka asenokbo Platinum Jubilee mungaka telemtetba mali joko tesüba küm 75 ji toktsüdi. Saka tang yangi asentenshia 3rd August 2015 koba anogo 7 Race Course Road Prime Minister official Residence nung Government of India aser NSCN (IM) tsüngda Framework Agreement tasür meyongnem agitep, koba dang Historic Peace Accord ta aja iba onük tama bena arudi. Iba ya Modi tsüngdang R.N.Ravi aser Th Muivah NSCN (IM) tena kuli agitep.

Iba mapang Modibai yamai ashi, Naga nunger yimten otsü ya joko küm 60 menua atsüshir. Ni Nagalimai aiben aruogo ni Naga nungerji jungjunga meteta lir aser kanga meimer. Anungji tanü ya asenoki tebilemtsü ka tatem kati arutsü kija atema jembir masü. Saka tarutsü jenjang tetenzüker lir. Yamaji kodang iba tenangzüktepba agitep nübur tila tulu ajak ali atashia pelatep. Aser asangsang asü pungmang ta asen Tsüngremi nübur sarasadem langzü südi ta bilem. Kechiaser Naga nunger yimjung teyongyaba ya atamata masü. Aser iba Agreement nung kechisa zülua ali aji metetnua kodang tejang tanga mapa akümtsü ta teyongyaba tulu nung atatep.

Anü adoker alur, ita tasen süngteter amar, küm tenzüker atemer, saka kecha ola osüng kata mali. Agreement to zep ta aleper shibanga ayuba Naga nunger nem memetetdaktsür (kept sealed and not known to the Nagas). Aiatai koda asütsü sünglang tatem atener temejakokdak maka ama, apa nung loli entok tebushidak maka küma oa Agreement taolen memetet kecha tsüngsü maka kümadok. Nübertembo yongyaseta tejang aongtsü atateper. Adangji Mongodong kiburia küm ana renteterbo joko yongyaseta kümsembuba nungbo yakta yongi tejang bushia aru ta ashir. Yamaji küm pezü sür ita asem shitak (3rd August 2015 to 31-10-2019) nung Agreement kibubai (Modiba) tejang bushiyonga aru (Government of India declared deadline of 31-10-2019). Saka tejangjibo yutsür tedonga mali asü. Mekaka ya koda asü sen paika to lalushiponga Agreement atemer Delhilen atazüba to koda ta süngmangtepa alidang Agreement yanglusangi (interlocutor R.N. Raviba) Republic anogo jembidang Naga nunger tebilemtsü latettsüba nung tejang matangtsü ta ashi. Aji angashia nübur ajak aama ali yima odaktsü ama bangkatep.

Joko Naga nunger ajak ya koda asü ta asüngdangtepa bushitep nung yangto Flag aser Constitution maden ta o-ji meyip. Süra iba anaji kong sama azüi chitsü asü koyai sür ao. Tamasayongi nübur SARU JANGKO atoker dang item itemi densema lirko ta kata mezütoki shia inyaktsü tim liasü ta bilemer. Kechiba küm pungo nungang ola adoker ta süngmanger. Tangbo joko nübertemi tamang makateti yamai asütsüba yagi tamasayongi miimbanga ayu ta ateter. Ano tang Modiba mapang nung jembir sür nung taoba Prime Minister Deve Gowda Narasinha Rao aser A.B. Vajpayee nungertemi o tajung shiogo. Naga nunger otsüji balaka (unique history) ta bangpet jembibaji mapang entoker dang ta bilemer. Parnokji dang mali aser asüyim nungi ni yamaji shiogo ta mashie ta mashitsü. Ano Nehru Naga nunger memeim Morarji Desai o tamajung ashi ta-a mejembai, mezülü tajungba ta asadangteter.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

West Bank nung Palestine nungertemi Yihusua sabang raksatsü



West Bank kübok Ebal tenem nung 'Joshua's Altar' noksa nung angur.

January 13, 2024: Israel aser Hamas na tsungda maneni raraba mapang nung West Bank nung Palestine nung longkak aitertermi Yihusua sabang raksatsüogo; iba tesem ya Khristantem aser Yihuda nungertem atema temeshi tesem lir.

Ebal tenem nung aliba 'Joshua's Altar' ya Yihusuai yangluba Laishiba sabang lir. Taoba hopta Palestine nung longkak aitertermi telok kati iba tesem nungji garitsüing arong aser Palestine nung wako songa yutsü.

Tesüiba küm ana tsungda Yihusua sabang ya aiben raksaja liasü.

Mount Ebal site ya 1980 küm Manasseh Hill Country Survey mapang nung Israel nung archaeologist, Adam Zertal-i mezüing nguteta liasü.

Khristan lenir aser shisashir, Rev. Petra Heldt-i, "Tia makai Muslim nungertemi Yihuda nung aser Khristantem indang temeshi tesem raksatsür, talisa Bethlehem anasa Rachel leper, Abraham, Isaac aser Yakob nung leper raksatsüogo; Hebron nung Yakob, Sarah, Lea aser Rebecca nung leper raksatsü, aser Shechem (Nablus) nung Yosef leper raksatsüba densema leper aika raksatsüogo," ta metetdaksü.

Paisa, "Item ama tatalokbatem ajanga Eretz

Israel nung Yihuda nung aser Khristantem puti otsü samatsütsü nukjidong nung inyakba temaitsü sayur. Anungji Israel nung tanga temeshi tesemtem ama iba temeshi tesem ya-a kümzüka ayutsüla," ta metetdaksü.

Heldt-isa, "Item ama teraksatsüba nungi iba tesem ya tangsa kümzüka ayutsüla," ta ashi.

"Iba sabang ya Yihusua (1400 BC) mapang nung liasü. Pa leniba nung Yihuda nung bendangli nungi nangzükba limai anir ao. Ebal tenem anasa Yihuda nung teti lidaksüba ajanga Yihuda nung aser Khristantem indang temeshi tesem ya wazüka yutettsü," ta pai ashi.

Forum for Struggle for Every Dunam nung züngsemtemia Ebal tenem nung teti atema Yihuda nung lidaksütsü tayongzükba agütsüogo.

"Alu mesüra jila nung Yihuda nung teti ali nung ang item tesem wazüka yutettsü aser iba sabang wazüka yutettsü, ta tanü asenoki jangjar," ta parnoki metetdaksü.

Yaküm October 7 nü Israel aser Hamas tsungda rara tenzük aser tang tashi raradar. October ita nung Hamas teloki Israel mezüing amakdang bendangertem densema Israel nung 1,200 dak tema asü aser nisung 240 dak tema puer oa liasü.

Gaza Health Ministry-i ashiba agi, tang tashi nung Gaza Strip nung Palestine nung 20,000 dak tema süogo.

Israel aser Hamas tsungda rara tenzükba sülen alima tesem balala nung Yihuda nung temeshi tesemtem aser Holocaust monuments aika raksatsüogo.

November ita tetenzüklen European Union-i, Europe tesem ajaklen Yihuda nung sempaba kanga bulua kümogo, ta metetdakja liasü.

November 5 nü European Commission-i sangdong ka ajanga, "European Union aser alima tesem ajaklen Yihuda nung sempaba mapatem onoki ngougo: Germany nung aliba synagogue nung Molotov cocktails shiloktsü, France nung 'stars of David' yanglusatsü, Austria nung Yihuda nung leper ka raksatsü, Spain nung Yihuda nung dokantem aser synagogues amak aser longkak aitertermi Yihuda nung anema yimyim ayima longkak ait," ta metetdakja liasü.

October ita nunga European Association for Preservation and Promotion of Jewish Culture & Heritage-i sangdong ka ajanga Izmir, Turkey nung synagogue amakba aser Spain kübok Besalü nunga synagogue amakba metetdakja liasü.

Khristmas mongpu nung India nung Khristantem anema inyak

January 13, 2024: Tesüiba küm ishika India nung Khristantem anema inyakba kanga bulua kümogo aser tia makai tawa Khristmas mongpu nunga linük nung Khristantem anema inyakba tatalokba aika liasü, ta International Christian Concern (ICC)-i metetdaksü.

Yaküm December ita tatembangbuba hopta (December 24-31) nung India tesem balala nung Khristantem anema inyakba tatalokba 23 liasü, ta United Christian Forum

(UCF)-i metetdaksü.

UCF-i ashiba agi, India tesem balala nung Khristmas mapang Khristantem anema inyakba tatalokba 23 nungji-Khristmas tekülem sentong ayongzüka agiba atema pastor pongu apuba, Uttar Pradesh nung anti conversion ozüing kübok Khristan asem apuba, Chhattisgarh nung Khristan ka tasü mang aremtsü memelaba, pastor ka kibong yimertemi sendokba, Andhra Pradesh nung Khristmas tekülem sentong agidang telok kati

Khristantem amakba aser Punjab nung tetsür pastor ka anema inyakba densema lir.

Item ama tatalokba aika anti-conversion ozüing tim mesü amshia Khristantem anema inyakba lir, ajisüaka sorkar ketdangsertemi mangu ama dang yutsür aser karibo Arogo anema inyakba nungjia shilem agir, ta UCF-i metetdaksü.

2023 küm piyong nung India nung Khristantem anema inyakba tatalokba 720 liasü, ta New Delhi nung amenoka aliba UCF-ia metetdaksü.

ANO GO ABEN TSÜNGREM DEN

KIBUBA TSÜBUBA KIBONG TEMOATSÜ

Pa aser par kinunger ajunga yimsü nung keta asenba aser Tsüngrem tsübuba nisungtem... aser Tsüngrem dang sarasadema liasü. ~ T. Mapa 10:2

Laishiba nung Tsüngrem bushiba aser pa dang sarasadema kibong nung kinunger ajak longjemer tanela temoatsü agizükba nisung aser kibong indang aika shia angur. Kodang asenoki T. Mapa 10 nung rebrangdangdir noklang madak tanishir Korneliar kibong madak Tsüngremer sayatenya tulu jungkai adokba indang zülua angur.

Rongsen tulu khonang tetushi dak metaloka tulu shisanga bilema, ajaki akhüm agüja alitsü akokba Korneliar kibong liasü, saka item alima tashi dang tama par kibongi Tsüngrem meim aser kinunger ajak longjemer pa bushi. Anungji Tsüngremer temoatsü koba "Tanela Tekümtet" lir; aji kibong rangbeni senmang amangtsüsa Tsüngremer tenyar par kidangi yoka pa sentong ataloka renem.

Yeremia 29:13, nung ashir, "Nenoki ni bushitsü aser ni angutsü, kodang nenok temulung ajak agi bushidir." Temeibatem, takar sensaker, tulu tila kecha mebendangi shiri temulung ajak agi Kibuba akh?m tsübua pa nendaka bushidir pa parnok dangi jungkai adoktsü, parnoki pa angutsü. Kibuba bushiteta angur taküm aser kibong koda tepelatsü aser temoatsü tulu asütsü. Shitakba asenok tamanger taküm aser kibongtem nung Kibuba bushiteta pa temoatsü ajangshia lir ma? Sarasadema shisadangdi.

Khristan film actor, Adan Canto süogo



Khristan actor, Adan Canto aser pa kinungtsü, Stephanie Ann Canto na noksa nung angur.

January 13, 2024: Khristan film tem nung actor, Adan Canto Hombarnü (January 8) alima nungi pilaogo; pa arrshi küm 42 dang liasü.

Adan Canto-i 'Designated Survivor' film nung vice presidential candidate, Aaron Shore shilem agiba ajanga kanga nungtugu aküm.

Pa mapang talangka appendix cancer agi shiranga aruba sülen asü.

Pa kinungtsü, Stephanie Ann Canto-i Instagram ajanga Mathi tapu 6:19-21 tetshia Adan Canto nem akhüm agütsüogo.

Mathi tapu 6 tekong 19-21 nung yamai zülua lir, "Nenoki pei asoshi ali nung rongsen terizüing, kong tarütsü aser song agi chimar, aser aueri rakpoker aser auyar. Nenoki pei asoshi kotak

nung rongsen rizüing kong tarütsü aser song agi machir aser aueri merakpoker aser maayar. Kechiaser kong nü rongsen lir, yanglji nü melung alitsü."

Laisa, "Teti atema kü rongsen Adan, kobi melii ajurutepti," ta metetdaksü.

Adan nem tetushi agüja UTA, Entertainment360 aser Viewpoint nung külem inyakertemi, "Adan dak tanela tarok liasü, aser ibaji kari dang meteta liasü. Iba nungji rangloker aika teti atema melenshiogo. Nisung aikati pa kanga menungratsü," ta metetdaksü.

Adan-i pa kinungtsü den tanur ana- arrshi küm asem jabaso, Roman Alder aser ita 21 jala, Eve Josephine nungertem toktsür pilaogo.

AO OSHI ANGAZÜKDAK:
TANÜ ANGAZÜKTSÜBA OJANG



Shipo

(n) ajongli mejaba meja tapu ka (termite)

* Dimapur nungbo shipo agi ki jara kanga raksatsür.

Shipok

(v) o miima meyui sapoka ashi (disclose)

* Senden nung tambusangi tama o shipok.

OLONG PAITEP # 6666

	1		2			3		4		5
6									7	
					8		9			
			10							
11										
				12						
13		14		15						16
17									18	

TIPIEN

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S _ _ _ _
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. _ _ _ hi
- 16. Akümüli nungi pilar

OLONG PAITEP # 6665 TELANGZÜBA

TIPIEN :

- 2. Anükalem, 4. Mesak, 5. Epet,
- 9. Meimtep, 11. Posü, 12. Patak,
- 13. Tekettsü.

LANGTSÜNGLEN :

- 1. Kümbang, 2. Ayak, 3. Leptep,
- 6. Nati, 7. Yiar, 8. Sangküm,
- 9. Metsük, 10. Mazü.

KHEN SHISADANGDI

NÜBURI MAGINÜBA ALOKBA NEM SHIDAKTSÜR :

Public : Hello.... Alokba! Naibo tiryimiyim nung junga atongtepa züluteter, ni ashiba ya jungjunga angang, aser züluang. Ya kü kiya masü, onok aika sentepa lirko noh....

Alokba : Shiangma züludi.

Public : 2023 küm onoki maginuba yabo melenshiangma.

1. Sannükertem (pastor) deobar shia fellowship melenteba Tsüngrem O jembia senzüba anenang. Küm 5 lirbo melentsüsaji, Pei aliba fellowship nung santem meteta yuang. San toktsür tangalen tesenzü.
2. Home evangelist lirji ta sur kidang moka tekazü. Ter shilem ajembaji jungjunga shisadangang. Mother skol, father skol, nung kangabo temolung tagütsü, ajak na dang inyaktsü masü, Retired Rev. tem aser trainingi yokertem peria lir. Parnok nem nunglokjangma.
3. Christmas aser tongtipang sentong nung pastor kinungtsütem teyok. Pei aliba fellowship nung aküm keta mongdakjang. Christmas aser new yearbo Sannukeri dang jembiang. Kiboksemi aor masüji idangji dang santemi pei kiburji metettsü.

Public : Ano aika lir, saka aji dang zülua liang.

Alokba : Nenoki mangateter ah ja ya! Parnok fellowship sema jajabaji, onok merenemnur, onok ken renembaji, küm peyong aji jembia jajar. ano bodbar, honibar, pei kinungtsü nem melenoka jembidaktsütsü. ta kechiang meshika, oda Tsüngrem aser parnok tsüngda parnoki dang metet ah noh....

Public: Oh Alokba noklang nung noklang nai shiogo....

-Aienla Ao

Manipur CM aser Governor-i Arjuna awardee Roshibina tushi



Imphal, January 13, 2024

(Agencies): Arjuna awardee Naorem Roshibina Devi-i President Droupadi Murmu ket nungi Arjuna Award 2023 agizük aser lai tanü Manipur governor Anusuiya Uikey aser Chief Minister N Biren Singh na den ajurutepogo.

Naorem Roshibina Devi ya Manipur nungi Wushu player ka lir. Roshibina den külemi lar coach aser tsüraburtemi Raj Bhavan nung Governor Uikey den ajurutep.

Idangji Governor-i Roshibina

nem tenüngsang agütsü aser tarutsü atema moatsü. Lai state aser linük atema konang bentsür aruba atema pelar ta Uikey-isa ashi.

Governor Uikey-i Roshibina coach aser tsüraburte dang la pusema nungitba atema pelaba metetdaksü aser Roshibina nem Rs.1,00,000 senpet agütsütsü metetdaksü.

"Arjuna Awardee, 2023 Naorem Roshibina Devi den kü residential office nung ajurutep" ta Manipur Chief N Biren Singh-i metetdaksü.

"Lai asenok peladaktsüogo aser konang bentsür aruogo. Lai maneni linük aser state atema konang bentsür arutsü imlar. La tarutsü atema moatsür" ta CM Biren-i ashi.

Roshibina-i 2023 küm 19th Asian Games held in Hangzhou, China nung Silver Medal angu, Texas, United States of America nung World Wushu Championship nung Silver Medal angu aser Moscow, Russia nung Moscow Wushu Stars Championship nunga Gold Medal angu.

Arunachal nung NSCN (IM) züngsem 6 apu

Guwahati, January 13, 2024

(Agencies): Arunachal Pradesh kübok Longding district nung sepaitemi National Socialist Council of Nagaland (NSCN-IM) züngsem 6 puogo.

Osang tejangja ka angazükba sülen paramilitary forces aser Longding police külemi mita aodang Niausa anasa NSCN (IM) züngsemtem apu ta SP Dekio Gumja-i ashi.

Knoknu aser Khasa

yimtsüngtem anasa prangpong-injangtem miima aliba angu. Sepaitemi MQ assault rifles 3, detonators, mobile phones aser tanga military supplies angu.

"Parnok yagi ketdangsurtem ama mapa inyak aser department tekolakpurtem den public lennirtem dang tashiyim agi sen meshi" ta SP Gumja-i ashi.

Parnok ya Wancho Region secretary Wangpang Wangsa (28), Major Pansa (64), Captain

Mikgam (27), Sergeant Thangwang (29), Captain Alung Ngodam (31) aser Lance Corporal Jamgang Gangsa (27) nunger ta jangjaogo.

Gangsa-i 2021 küm Eastern Naga National Government (ENNG) nungi temai adok aser iba sülen NSCN-IM nung aden.

Iba dak sendakba nung Longding police station nung Arms Act kübok ken o ka benokogo.

Uruka benjung atema ango 2,000 metric tons bener arutsü

Guwahati, January 13, 2024

(Agencies): Magh Bihu amongtsü anogo ka jakdang Assam nung nübortemi Uruka amongtsü renemteper.

Iba benjung nung ango kanga achir aser Guwahati nung aliba Uzan Bazar ghat fish market nung nisung kanga longsoa kümogo. Assam nung apuba ango dak alia India kübok tesem balala ango 2,000 metric tons

(MT) shi ka bener arutsü.

"Betkuchi nung aliba GMC Wholesale Fish Market nung Uruka Day atema ango renema lir. Andhra Pradesh, West Bengal, Delhi, Lucknow, Kanpur, Madhya Pradesh aser tangalen nungi angotem bener arua lir" ta Brihattar Guwahati Paikary Mas Becha -Kina Somobai Samiti Ltd. (BGPAMKSSL) secretary

Kajal Paul Choudhury-i ashi.

Anogoshia tanga state tem nungi truck 4-6 shi ka nung ango 48-72 MT shi bener arur. Ajsüsüka Uruka atema tanga state tem nungi wholesale fish markets nung truck gari 50-60 shi bener aruogo ta pai ashi.

Assam nung ango apuba renloka arur aser 2022-23 nung 4.43 lakh MT shi puogo ta State Fishery Department-ia ashi.



President Droupadi Murmu-i Meghalaya Games 2024 atema Tura semdangtsü aliba atema Chief Minister Conrad Sangma-i P A Sangma Stadium semdanga maparen inyakba reprangshiba angur.

EduVersity ^{plus}
CSE PREPARATION 2.0EduVersity ^{plus}
CSE PREPARATION 2.0EduVersity ^{plus}
CSE PREPARATION 2.0**New Year Offer****NPSC FOUNDATION COURSE****@Just RS. 25,000/-****Offer valid till 15th Jan' 2024****Be the Next EAC - DSP - SA of the State**

KOHIMA CAMPUS

DIMAPUR CAMPUS

ediversityplus.com

ediversitykohima@gmail.com

+91 7005114715

+91 7085685569

COURSE BENEFITS**FREE**

ANSWER WRITING PROGRAM

MATERIALS

ESSAY WRITING PROGRAM

MOCK TEST SERIES

GENERAL ENGLISH PROGRAM

MOCK INTERVIEW

CURRENT AFFAIRS MAGAZINE

PLUS FREE CERTIFIED**COMMUNICATION SKILLS & PERSONALITY DEVELOPMENT CLASSES**
with coordinators of**TRINITY**
COLLEGE LONDON**Join the No.1 Civil Service Institution****MULUNGNEN O****JULY 02, 1952 – DECEMBER 29, 2023.****"Kibubai agütsü aser Kibubai bener ao; Kibuba tenüng moajang." Yob 1:21.**

Ozü temeim Lt. Dr. Toshimanen Ozüküm nem akhüm tetushi agütsür aser onok mangyim jashi tia nung alidang kija-kibong aser lokti tentetemi onok mulung süneja sarasadem aser temeim agi yaritepba asoshi onoki nenok ajak dang kanga pelaba lemsateper. Iba ama mulung süngzük aser taneptsü bushiba lenmang nung nenok teyari tulu agi onok meketa temeim agi sünga kümogo aser nenok ariabilem temeim tashi nung soiter onok aoer.

Asen Kotaker tebu ket nung azüiter teti tepeladak Lt. Dr. Toshimanen tanelai tesünep nguogo aser pa temeim mapatem agi onok mulungjung nung teti jembir aser nenok ajak teyaritep agi onok mulung tali anisüngzudaktsür. Yisu Khrista taochi aser imlibilem tashi nung onok tanela ajungket aser ibaji ozü temeimba taküm agi sayuogo, shiba tangbo teti asoshi Khrista den longjemogo.

Onoki nenok ajak dang kangasa pelar aser onok sarasadem teti nenok den lir.

~ Temeim Kinungtsü, Chirnur aser Kinungertem.

Turkey-i Iraq aser Syria nung Kurdish telok amak

Ankara, Aenjeti/January 13 (Agencies): Iraq nung Turkey nung sepai teku tashi tepsetba dak sendakba nung Turkey-i Syria aser northern Iraq nung Kurdish telok den sendaka aliba tesem aika makogo, ta defence ministry-i ashi.

Iraq nung Turkey indang military base ka maka sepai teku tashi tepsetba sülen anogo ka lir Honibarnü item tesemtem maka liasü.

Ministry-i ashiba agi, tesem 29 makogo, kong Kurdistan Workers' Party (PKK) aser People's Protection Units (YPG); Syria nung Kurdish telok indang longpok, bunker, tejenokdak balala aser oil installations tem densema lir.

Turkey-i mapangshia Syria aser Iraq nung PKK pur tamendakdak asütsü ta temulung meleme bilemba tesemtem maka arudar.

Kurdish separatist telok, koba Turkey nung tenokdangba agütsür lir, iba telok ya Turkey, European Union aser United

States nungeri kiralongrar telok ka ta züngshir.

Defence ministry-i ashiba agi, fighter jets temi northern Iraq nung Metina, Hakurk, Gara aser Qandil kübok tesem balala maka liasü. Ministry-isa, kiralongrartemi lisopurtem aser security forces amakba nokdangtsü aser arrtsü nung kecha mepetmesü madokdaktsütsü nükjidong nung iba jenjang ya agiogo.

Osang ajanga ashiba agi, item tesem balala amakdang tsükchirtem aika tepsetogo.

Hokolbar aonung northern Iraq kübok semiautonomous Kurdish region nung military base ka maka sepai pongu tashi tepset. Iba sülen ano mapang tatsüka lir yirur alir sepai pongu asü. Ministry-isa parnoki kiralongrar 15 tepsetogo, ta ashi.

PKK, Baghdad nung amenoker aliba sorkar mesüra iba tesem administration-i iba tatalokba dak sendakba nung kecha telangzüba magütsü.

Turkey-i 2022 küm April ita northern Iraq nung Operation Claw-Lock tenzük aser iba mapang Duhok governorate kübok base aika amenoka liasü. Turkey-i parnok indang sepaitem item tesemtem nung amenoka toktsüba Iraq-i ashishia arudar aser sepaitem tangsa tang agintsü takhangba agütsüogo.

"Onoki PKK kiralongrar telok anema arrtsü telung aser tema nung tatem tashi raratsü," ta Turkey indang foreign minister Hakan Fidan-i ashi.

Tir Recep Tayyip Erdogan-i Honibarnü Istanbul nung security senden ka ayongzüka menogo, ta pa indang communications director Fahrettin Altun-i ashi.

Kasa mapang nung Honibarnüsa Turkey kübok tesem balala nung PKK den sendaktepa alitsü ta temulung meleme bilemer nisung 113 puogo, ta interior minister Ali Yerlikaya-i X sabang ajanga metetdaktsü.

US-i Yemen nung Houthi telok tamendakdak amak

Sanaa, Aenjeti/January 13 (Agencies): United States-i anogo anabuba atonga Yemen nung Houthi telok makogo. Iran den sendaktepa aliba telok yagi parnok indang facility tem aika amakba sülen parnoki telangzüba agütsütsü ta tekümdangtsü metetdaktsüogo. US military indang Central Command (CENTCOM)-i Honibarnü ashiba agi, parnoki US Navy indang USS Carney nungi Tomahawk missile tem Houthi pur indang radar amenoka aliba tesem nung khaloktsüogo.

Temerem tzüyim nung Houthi puri shishilembar aser military indang rongtem amakba sülen US aser United Kingdom-i ali aser tzüyim ajanga Yemen kübok Houthi military amenoka aliba tesem amakba sülen tang ano maneni tesem balala makogo.

"Ni bomb apokba angashiogo aser nisung aikati social media nung linük yimtiba Sanaa nung bomb tesashi apokba angashiba indang jembio," ta Al Jazeera osangbener Mohammed al-Attab-i Yemen yimtiba nungi metetdaktsü.

US tir Joe Biden-i Hokolbarnü sangdong ka ajanga pai ano tesem timba amaktsü atema tetuyuba agütsütsü akok ta tekümdangtsü metetdaktsüogo. "Houthis puri maneni iba yimya beshira onoki telangzüba agütsütsü," ta Biden-i ashi.

Houthis puri parnok inyakyim ya, Gaza nung taoba ita asem tashi Palestine nunger sabanga yur Israel nunger sepaitemi amakba anemb temaitsü ka lir, ta ashi.

US Department of Defense-i ashiba agi, Brehostibar aonung mezüngbuba Yemen amakba mapang parnoki US aser UK indang "maritime & air platforms" tem nungi injang 150 dak tema khalokja Houthi puri azüoker aliba tesem 16 dak tema maka liasü.

Parnoki amakba tesemtem rongnung prangbong injang bendena ayudak, launch sites, air defence radars, "command & control nodes", aser "production facilities" tem densema liasü, ta department-i ashi.

Houthi telok, shirnoki Yemen

küm ter shi amokbanger arudar, parnoki ashiba agi, parnok sepai pongu tashi tepsetogo. Parnokisa rongtem maneni amaktsü ta tenangzüka agütsüogo.

US-i ashiba agi, Houthi teloki temerem tzüyim nung shishilemba dang amshiba rong 27 ben dak tema makogo.

2016 küm sülen tang mezüngbuba Yemeni nung tesem balala makogo aser Israel aser Gaza na October 7 nü nungi rara tenzükba sülen drone aser missile amshia shishilemba dang amshiba rongtem amakba sülen tang mezüngbuba US military-i telangzüba agütsüogo.

Houthi movement, shirnoki küm ter shi anüolen aliba linük-i teyari agüja Saudi-i aniba telok den raraba sülen Yemen tuluba ka azioka lir, parnok ya Israel den raraba mapang Hamas pusemertem lir. Gaza rara nung nisung 23,000 dak tema tepsetogo, kong tanur 10,000 shi densema lir aser iba den nisung 60,000 dak tema yiruogo.

Ajisüaka US den sendaktepa alirtem ajakibo Yemen amakba pu masem. Netherlands, Australia, Canada aser Bahrain-i logistical aser intelligence support agütsü aser kasa mapang nung Germany, Denmark, New Zealand aser South Korea-i arok sangdong ka ajanga Yemen amakba pusemogo aser maneni jenjang tesashi agitsü ta tekümdangtsü metetdaktsüogo.

Ajisüaka Italy, Spain aser France nungeri mepetmesü tuluba küma aotsü tsübuva bilemba ajanga iba inyakyim nung shilem magitsü telemtetba agi.

Yemen nungerem yimti aika nung meyirejang aika adenshia US aser UK nati tesem balala amakba aitsüba den Israel inyakyim aitsü aser Palestine nunger pusemba nenshia metetdaktsüogo.

"Nenoki Yemen amakba ya kiralongrar inyakyim lir," ta Houthi telok indang political council züngsem Mohammed Ali al-Houthi-i ashi.

Biden administration-i, Houthi telok ya 2021 küm US State Department indang "foreign terrorist organizations" list nungi agina liasü.

66buba KVSA asayamung tenzükogo



Alakteta jaoker aser Vice President Athletics Federation of India, Advisor to CM Nagaland & Chairman IDAN, Abu Metha aser tanga ketdangsürtem 66buba KVSA Meet lapokba sentong nung shilem agiba mapang tangokba noksa nung angur.

Dimapur, Aenjeti/January 13 (TYO): 66buba Kohima Village Sports Association (KVSA) Meet 2024, January 13 nü Kewhimia Ground, Ziekezou nung Vice President Athletics Federation of India, Advisor to Chief Minister Nagaland and Chairman IDAN, Abu Metha-i tenzüktsüogo.

Sentong nung o jembiba mapang Metha-i, Kohima yimtsüing nung alirtem den salem lemsatop aser Nagaland Chief Minister, Neiphiu Rio aser sports fraternity ajunga tenüing nung salem osang lemsatopa liasü.

Pai ashiba agi, Kohima yimtsüing nungi Naga nung asoshi lenla ajak nung jala aser jabaso tajungtibatem adokdatsüogo ta ashi.

Metha-isa, lokti nung telongjem adokdaksütsü atema

saisapong kodang tongtibang iba indang lemsatopba den asaya balala ya tangbo hobby ka dang masü saka meranga inyakertem atemabo career tajung lir ta ashi. Pai, alima jenjang nung tokteptsü atema Nagaland nung saisapong temaba jenjangi ajungkettsü nüngdaker ta ashi. "Asenoki saisapong nung temaba jenjang atongtsü merangtsüla," ta pai ashiba den Nagaland nung saisapong dak sendakba nung tebilemba melenshitsü nüngdaker ta shisem.

Paisa, chief minister tawabangba kübok state sorkari saisapong ajungkettsü atema jenjang balala agibatem indang metetdaksü. State nung saisapong jenjang melenshidar saka ano talangka aotsü lir ta Metha-i ashiba den sorkari

saisapong ajungkettsü atema takokba tashi jenjang tapet agitsü tenangzükba agütsü.

Naga nung tetsür aser teburtem dak sempet tajung lir saka asaya nungbo meranga minyak takok tajung mongutettsü, ta shia pai lanurtem dang meranga inyaksü ajunshia liasü.

Infrastructure dang sendakba nung pai ashiba agi, state sorkari sports infrastructure tasentem dang sendakba nung sports policy tasen ka yangludar aser high performance coaching camp tem aser bendanger coach tem ajanga asayartem Nagaland tenüing nungi asayadakja arudar.

Sentong nungsa Athletic Secretary KVSA, P George Vizo lenisüba nung asayartem tenangzüktepba agia liasü.

ISL Transfer: FC Goa-i Yasir loan nung anirogo

Aenjeti/January 13, 2024 (Agencies): FC Goa-i midfielder Mohammad Yasir club-i tanaben mapang tatsüka atema loan nung Hyderabad FC nungi anir aruba sangdongogo. Arishi küm 25 tain asayar ya 2023-24 season tanabuba shilem atema Goa nung denogo.

Hyderabad puri kümtem tsüingda takok ngua aoba nung Yasir-i tongtibang shilem agiogo, kong 2021-22 season nung taoba coach Manolo Marquez lenisüba nung ISL Cup akokba densema lir aser tang tena ano FC Goa nung longjemtsü.

"FC Goa-i aruba ya kidangi meyipa arur ama bilemer. Ni meyipa arua medemer tejen kar den longjemba atema kanga pelar aser ni kanga anisüingzuka bilemer. Taoba mapang jangradema asayaba bilemteter aser tang asaya aliba season nunga ano tajangshiba aika ajangshia aotsü yongya atar," ta Mohammad Yasir-i ashi.

"Coach Manolo den tanaben inyaksü ya maongka tulu lir. Ni pa inyakyim angateter aser iba ajanga ni tajungba asayateter aser pa lenisüba nung FC Goa pur takok ngua aoba nung ni teyari agütsütsü yongya atar," ta

paisa shisem. Kasa mapang nung FC Goa head coach Manolo Marquez-i ashiba agi, "Yasir ya onoki aginüba angateta asayaba asayar ka lir. Pa ya season tanabuba shilem asoshi asayar tajung ka asütsü ta ni meteta lir. Pa taoba küm ishika tsüingda asayar tajung ka kümogo aser onok asayaba yimya den pa sempet kanga puteper, anungji pai team nem teyari tulu agütsütsü."

Yasir ya Pune FC indang youth team nungi asayaba mapang jangja aküm. Pai kanga junga asayaba ajanga Pune FC indang first team nung anioka liasü. Iba sülen pa Pune City FC indang U18 team nung asaya aser ISL 2017-18 season nung FC Goa puri alizüka liasü.

Pa 2017-18 Super Cup nung FC Goa nungi khen asaya aser kasa küm Second Division League nung FCG indang Development Team nungi asaya liasü. Iba sülen pa Pune City-i ao aser Hyderabad FC nung dena liasü. HFC nungi pa 91 ben asaya aser iba mapang pai goal trok idaksü aser assist 15 süja liasü.

Rapid-Fire Shooter Vijayveer-i ano Olympics quota ka nguogo



Vijayveer Sidhu

Aenjeti/January 13, 2023 (Agencies): India nung shooter Vijayveer Sidhu-i Honibarnü Asia Olympic Qualifiers nung tebur 25m rapid-fire event nung silver medal anguba sülen linük asoshi Paris Games quota 17buba ngutetogo.

Arishi küm 21 tain shibai taoba küm Hangzhou Asian Games nung team event nung bronze medal ngua liasü, pai 25m rapid fire asaya atema Anish Bhanwala den Olympics atema quota ka ngutetogo.

Anish-i taoba küm Changwon, Korea nung Asian Championship asayaba mapang bronze medal ka ngua Olympics atema quota nguteter liasü.

Vijayveer pezübuba nung final atema qualify asüba sülen medal monguaka Olympics atema quota angutsü jangjar liasü.

Honibarnü iba asaya nung final asayar trok rongnungi

temaba pezüi quota angutsü liasü aser Chandigarh nungi asayar yagi elimination round nung point 28 ngua silver medal angu. Iba asaya Kazakhstan nung asayar Nikita Chiryukin-i (32) koka liasü.

Rapid-fire pistol event nung India nung asayartemi kanga junga asaya arudar aser Vijay Kumar-i 2012 London Olympic Games nunga silver medal ka nguogo.

2020 Olympics masaya tsüingda Tokyo atema quota angutsü imlartem rongnung Anish-a ka liasü saka 2021 küm New Delhi nung ISSF World Cup asayaba mapang pai iba quota mongutet.

India nung shooter temi Jakarta nung paris Olympics atema quota pezüi nguogo. Esha Singh (women's 10m air pistol), Varun Tomar (men's 10m air pistol), Rhythm Sangwan (women's 25m sports pistol) aser Vijayveer nungeri quota ngutetogo.

Malaysia Open: Satwiksairaj & Chirag na final-i iogo



Satwiksairaj & Chirag

Aenjeti/January 13, 2024 (Agencies): India nung rongnungi nungtugu badminton tarep asayar Satwiksairaj Rankireddy aser Chirag Shetty nati tang asaya aliba Malaysian Open nung maneni kanga junga asaya Honibarnü South Korea nung tarep Kang Min Hyuk aser Seo Seung Jae na straight games nung koka final-i iogo.

India nung asayar anayagi semifinal asaya nung South Korea nung tarep ya 21-18, 22-20 agi koka final tongtetogo.

Tena final nung China nung tarep Wang aser Liang

mesüra Japan nung tarep Kobayashi aser Hoki na den asayatsü.

Second-seeded tarep Satwik aser Chirag nati 2023 küma iba asayamung nung semifinal tonga asayaogo aser taküm tajungba asayatsü imla asayaba mapang semifinal nung world No. 9 Korea nung tarep den ya minute 44 kanga toktepa asayaogo. Hyuk aser jae nati taoba küm Satwik aser Chirag na Thailand Open aser China Open nung tsükdaksür liasü.

Taoba küm Asian Games nung gold medal ngua aliba

tarep Satwik aser Chirag nati Honibarnüa kanga junga asaya ajisüaka Korea nung tarep yagi tena ayong ayonga masayadaksüi kanga toktepa asaya liasü.

Satwik aser Chirag nati taoba küma kanga junga asayaogo. Tenati taoba küm Asian Games nung gold medal angu aser iba sülen Indonesia nung Super 1000 asayamung ka akok. Tenatisa Korea Open Super 500 aser Swiss Open super 300 akok aser tena indang career nung mezüingbuba World No. 1 tarep küma liasü.

BILEMDANGANG

"Menürem jakden agi tangar mulung sangwadaksür."